

# ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅՅՈՒ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: [prelacy@armenianprelacykw.org](mailto:prelacy@armenianprelacykw.org)

ՆՈՐ ՇՐՋԱՆ, Ը. Տարի, Թիւ 342, Ուրբաթ, 15 ՅՈՒՆԻՍ, 2016

ԼՈՒՐԵՐ ԱՆԹԻԼԻԱՍԷՆ

## ՄԻՋ-ԹԵՄԱԿԱՆ ԵՐԻՏԱՍԱՐԴԱԿԱՆ ՀԱՄԱԳՈՒՄԱՐԸ ՄԿՍԱԻ ԻՐ ԱՇԽԱՏԱՆՔՆԵՐՈՒՆ ԱՆԹԻԼԻԱՍԻ ՄԱՅՐԱՎԱՆՔԷՆ ՆԵՐՍ



Մեծի Տանն Կիլիկիոյ Կաթողիկոսութեան  
Լսատեսողական եւ Երիտասարդական  
բաժանմունքներուն կազմակերպութեամբ գումարուող  
միջ-թեմական երիտասարդական համագումարը  
սկսաւ իր աշխատանքներուն, 14 Յուլիս 2016-ի  
առաւօտուն:

Մեծի Տանն Կիլիկիոյ Կաթողիկոսութեան թեմերէն  
ժամանած երիտասարդները Պիքֆայայի Սուրբ Աստուածածին Վանքի Վեհաբանի դահլիճին  
մէջ հանդիպում ունեցան Ն.Ս.Օ.Տ.Տ. Արամ Ա. Վեհափառ Հայրապետին հետ: Նորին Սրբութիւնը  
բարի գալուստ մաղթելէ ետք մասնակիցներուն, լուսարձակի տակ առաւ սոյն համագումարին  
կարեւորութիւնը, շեշտելով որ երիտասարդութիւնը կը պատկանի ներկային եւ ոչ ապագային  
ու անոր մէջ կը կայանայ գաղութներուն վերանորոգման եւ գոյատեւման հրամայականը:  
Վեհափառ Հայրապետը լուսարձակի տակ առաւ Սփիւռքի մէջ  
հայ ինքնութեան պահպանման կարեւորութիւնը եւ  
անդրադարձաւ Հայ Եկեղեցւոյ դերակատարութեան այս ծիրէն  
ներս: Ան նշեց, որ մեր գաղութներուն մէջ այսօր մարդուժը կը  
պահանջէ արհեստավարժ երիտասարդներ, քաջալերելով  
երիտասարդութեան գործօն մասնակցութիւնը մեր ազգային ու  
եկեղեցական կեանքէն ներս:



Վեհափառ Հայրապետը նաեւ խօսեցաւ Շաբաթ 16 Յուլիս 2016-ի համագումարի յատուկ  
նիստերուն ընթացքին քննարկուելիք «Ընկերային ցանցերը եւ հայ երիտասարդութիւնը»  
այժմեական թեմային մասին:

Հանդիպումէն ետք մասնակիցները ծանօթացան Սուրբ Աստուածածին Վանքին ու անոր մէջ  
գործող Մեծի Տանն Կիլիկիոյ Կաթողիկոսութեան սիրտը հանդիսացող Դպրեվանքին: Թեմերէն  
ժամանած երիտասարդները հպարտութեամբ շրջեցան Վանքէն ներս, տեսնելով  
վերանորոգուած եւ ամբողջական վանական համալիրի տեսք ստացած այս կեդրոնը, որ լծուած  
է Հայ Եկեղեցւոյ համար հոգեւոր մշակներ պատրաստելու առաքելութեան:

Նշենք, որ միջ-թեմական երիտասարդական այս համագումարը կը շարունակուի մինչեւ  
Շաբաթ 16 Յուլիս 2016:

ՀԱՅԿԱԿԱՆ

## 9,8 Միլիոն Տոլար` Հիւանդութիւններու Վերահսկման Եւ Կանխարգիլման Ազգային Կեդրոնի Կառուցման Համար

13 Յուլիսին տեղի ունեցաւ Հայաստանի առողջապահութեան նախարարութեան հիւանդութիւններու վերահսկման եւ կանխարգիլման ազգային կեդրոնի եւ Հայաստանի գիւղատնտեսութեան նախարարութեան սննդամթերքի անվտանգութեան պետական ծառայութեան կեդրոնական կառոյցներու բացման արարողութիւնը, որուն ներկայ էին Հայաստանի առողջապահութեան նախարար Արմէն Մուրադեանը, գիւղատնտեսութեան նախարար Սերկէյ Կարապետեանը, Հայաստանի մէջ Միացեալ Նահանգներու դեսպան Ռիչըրտ Միլզը, Միացեալ Նահանգներու պաշտպանութեան բաժանմունքի Վտանգներու նուազեցման գործակալութեան ներկայացուցիչ Էլիզապէթ Ճորճը:



«Առողջապահութեան մարզին մէջ նման տարրալուծարանի բացումը անգամ մը եւս կ'ընդգծէ այն, որ մենք հանրային առողջապահական ծրագիրները կը նկատենք գերակայ ուղղութիւն, եւ իւրաքանչիւր նման ծրագիր արժանահաւատ կը դարձնէ մեր մօտեցումները բնակչութեան համար: Անիկա կոչուած է ամբողջովին փոխելու մեր պատկերացումները վարակիչ հիւանդութիւններու

յայտնաբերման, անոնց պատճառներու ճշդման եւ կանխարգիլող արշաւներու կազմակերպման առումով», ըսած է առողջապահութեան նախարար Արմէն Մուրադեանը` տեղեկացնելով, որ 14 Յուլիսին նմանատիպ կեդրոն պիտի բացուի նաեւ Գիւմրիի մէջ: Կեդրոնները կառուցուած եւ վերանորոգուած են Միացեալ Նահանգներու պաշտպանութեան բաժանմունքի Վտանգներու նուազեցման գործակալութեան աջակցութեամբ:

Դեսպան Ռիչըրտ Միլզ իր խօսքին մէջ կարեւոր նկատած է երկու նախարարութիւններուն հետ համագործակցութիւնը: «Այս նոր ազգային կառոյցի բացումը եւ մեր համագործակցութիւնը նախարարութիւններուն հետ շահաւէտ է ո՛չ միայն Հայաստանի համար` ապահովելով երկրի անվտանգութիւնը, այլ նաեւ ամբողջ աշխարհին համար` օգնելով հիւանդութիւններու տարածման դէմ պայքարին: Մենք գիտենք, որ ներկայիս համաշխարհայնացուած եւ փոխկապակցուած աշխարհին մէջ հիւանդութիւնները սահմաններ չեն ճանչնար: Ուստի պէտք է բոլորս միասին աշխատինք կենսաբանական զէնքերու տարածման կանխարգիլման ուղղութեամբ»:

Էլիզապէթ Ճորճ յայտնած է, որ գիւղատնտեսութեան նախարարութեան կեդրոնին համար ներդրուած է 4,1 միլիոն, իսկ առողջապահութեան նախարարութեան կեդրոնին համար` 9,8 միլիոն տոլար:

[WWW.AZTAGDAILY.COM](http://WWW.AZTAGDAILY.COM)

## Արձագանգելով Ա. Վարդանեանին. Նարեկ Սարգսեան Կը Խոստանայ Հետեւողական Ըլլալ Արամ Մանուկեանի Տունը Պահպանել-Վերակառուցելու Հարցով

Հայաստանի Հանրապետութեան քաղաքաշինութեան նախարար Նարեկ Սարգսեան 13 Յուլիսին պատասխանած է ՀՅԴ Գերագոյն մարմինի ներկայացուցիչ Ադուան Վարդանեանի հարցումին, որ կը վերաբերի Արամ Մանուկեանի տունը պահպանել-վերակառուցելու հարցին: Այս մասին «Արմէնփրես»-ին յայտնած են Հայաստանի քաղաքաշինութեան նախարարութեան տեղեկատուութեան եւ հասարակութեան հետ կապերու բաժինէն:

Նախարարը ըսած է. «Հայաստանի կառավարութեան 7 հոկտեմբեր 2004-ի թիւ 1616 որոշումով, ճարտարապետ Բորիս Մեհրաբեանի նախագիծով Արամի 9 հասցէին վրայ գտնուող, 1910-ին կառուցուած շէնքը, ուր ժամանակին բնակած է քաղաքական եւ հասարակական անուանի գործիչ Արամ Մանուկեանը, ընդգրկուած է Երեւան քաղաքի պատմութեան եւ մշակոյթի անշարժ յուշարձաններու պետական ցանկին մէջ՝ իբրեւ հանրապետական նշանակութեան յուշարձան: Ներկայիս կառոյցը ներառուած է «Հին Երեւան» համալիրի կառուցապատման ներդրումային ծրագիրին մէջ: Ըստ ծրագրի նախագիծին, նախատեսուած է պահպանել եւ վերակառուցել գոյութիւն ունեցող շինութիւնը, իբրեւ ընդհանուր համալիրի մաս»:

Անոր համաձայն, Հայաստանի քաղաքաշինութեան նախարարութիւնը՝ իբրեւ 2 դեկտեմբեր 2014-ին «Մալթիքոնթինենթըլ Տիպթիպիլըն» ընկերութեան հետ՝ ի դէմս գուլիցերիաբնակ ներդրող Վարդան Սրմաքէշի, «Հին Երեւան» կառուցապատման ներդրումային ծրագիրին վերաբերեալ համաձայնագրի Հայաստանի կառավարութեան կողմէ ստորագրող կողմ, հետեւողական պիտի ըլլայ շէնքի պահպանման եւ վերակառուցման գործընթացներուն: Միեւնոյն ատեն նկատի առնելով հասարակական եւ քաղաքական բազմաթիւ կազմակերպութիւններու կողմէ բազմիցս ներկայացուած առաջարկները՝ վերոյիշեալ շէնքին մէջ Արամ Մանուկեանի կեանքին եւ գործունէութեան նուիրուած թանգարանային գօտի ստեղծելու մասին, Հայաստանի քաղաքաշինութեան նախարարութիւնը հետամուտ պիտի ըլլայ ծրագրի իրականացման ընթացքին կառուցապատող ընկերութեան խնդիրը ներկայացնելու եւ իրագործելու հարցին գծով:

## Հակառակորդին Ուղղաթիռները Թռիչք Կատարած Եւ Շփման Գիծէն 30 Քմ Խորութեան Վրայ

13 Յուլիսին՝ ժամը 8:26-էն սկսեալ (Երեւանի ժամանակացոյցով) Լեռնային Ղարաբաղի եւ Ազրպէյճանի հակամարտ գօրքերու շփման գիծի հարաւարեւելեան ուղղութեամբ, շփման գիծէն 30 քիլոմէթր խորութեան վրայ, հակառակորդը ուղղաթիռներով եւ օդանաւերով կատարած է ուսումնամարտական թռիչքներ: Այդ մասին կը հաղորդէ Լեռնային Ղարաբաղի պաշտպանութեան նախարարութեան մամլոյ ծառայութիւնը՝ նշելով, որ ժամը 11:00-ի դրութեամբ թռիչքներ կը կատարէին 12 օդանաւ եւ 41 ուղղաթիռ:

«Պաշտպանութեան բանակի հակաօդային պաշտպանութեան ուժերը կրակային եւ դիտարկման համակարգերու միջոցով կը վերահսկեն ազրպէյճանական զինուած ուժերու ուսումնամարտական թռիչքները եւ աչալուրջ կերպով կը հետեւին անոնց գործողութիւններուն», նշուած է այս առիթով հրապարակուած հաղորդագրութեան մէջ:

## Երևանի Մէջ Բացուեցաւ Առաջին 5 Աստղանի Պանդոկը՝ «Ռետիսարն Պլու Հոթել»

Հայաստան մուտք կը գործէ միջազգային «Քարլսըն Ռեզիտըր» ընկերութեան պատկանող «Ռետիսարն Պլու» պանդոկներու ցանցը: Հայաստանի նախագահին ներկայութեամբ տեղի ունեցած է բացումը Երևանի առաջին 5 աստղանի պանդոկին, որ վեր կը խոյանայ «Յաղթանակ» զբօսայգիին կողքին, եւ որ այցելուներուն կը խոստանայ անզերագանցելի ծառայութիւններ մատուցել:



«Իսկապէս հաճելի է Հայաստանի մէջ ներկայացնել մեր պանդոկը, որ կը յատկանշուի իր յատուկ ոճով եւ «Այո՛, կրնամ» գաղափարախօսութեամբ, որով կ'առաջնորդուին ցանցին բոլոր պանդոկները: Շնորհակալ ենք մեր գործընկեր «Գոլդէն Փելլիս» ընկերութեան, որուն հետ արդիւնաւետ համագործակցութեան շնորհիւ այս 5 աստղանի պանդոկը արդէն մուտք կը գործէ նաեւ Երևան», ըսած է «Ռետիսարն Պլու Երևան»-ի գլխաւոր տնօրէն Ճորճ Միուն: Ըստ անոր, միջազգային մակնիշ ներկայացնելէ զատ իրենք նաեւ բարձրակարգ ծառայութիւններ կը մատուցեն, ինչ որ անտարբեր չի ձգեր ոեւէ յաճախորդ: Ստեղծուած է 134 աշխատատեղ, ուր միակ օտարը, Միուի համաձայն, ինքն է:

Բացման ընթացքին Հայաստանի նախագահը շրջագայած է Երևանի բարձրակարգ պանդոկներու շարքը համալրած «Ռետիսարն Պլու» պանդոկին մէջ, ծանօթացած կատարուած աշխատանքներուն, իրականացուած ներդրումներուն, ստեղծուած աշխատատեղերուն եւ առաջարկուող ծառայութիւններու որակին:

Լրագրողներուն ներկայացնելով «Ատասթրա» (թարգմանաբար՝ դէպի աստղերը) բացօթեայ ճաշարանը, որ պիտի սպասարկէ ո՛չ միայն պանդոկի յաճախորդներուն, այլ նաեւ ոեւէ անձի, Միու ըսած է, որ անիկա շատ լաւ վայր մըն է, մանաւանդ որ տեսարանը կը նայի դէպի Արարատ, կրնայ ընդունիլ 250 անձ: Լրագրողները առիթ ունեցած են շրջագայելու պանդոկին մէջ, նաեւ ծանօթանալու նախագահական սենեակին, որ 200 քառակուսի մեթր տարածութիւն ունի եւ նախատեսուած է թագաւորական հիւրերու, ինչպէս նաեւ բոլոր անոնց համար, որոնք կ'ուզեն թագաւոր զգալ: Անիկա բաղկացած է հիւրասենեակէ, աշխատասենեակէ, ննջարանէ եւ գրադարանէ, մէկ գիշերուան համար կ'արժէ 2 հազար տոլար: Միւս սենեակներուն միջին գինը կը տատանի 80 հազար դրամի սահմաններուն մէջ:

«Ռետիսարն Պլու Հոթել Երևան»-ի վաճառքներու բաժինի տնօրէն Մարիամ Ստամբուլցեանի համաձայն, պանդոկին մէջ կայ 142 սենեակ, որոնցմէ 19-ը բարձրակարգ, լիքս են, իսկ երկուքը՝ արքայական եւ նախագահական սենեակներ են: 2 սենեակ ալ նախատեսուած է տեղաշարժման դժուարութիւններ ունեցող անձերուն համար: «Ունինք 6 հանդիպման սրահներ, մեծագոյնը թատրոնաձեւ շարուածքով, ուր կրնան տեղաւորուիլ 200 անձեր: Ունինք սպայ, 7 բուժման, մարձումի սրահներ, 25 մեթր երկայնքով լողաւազան: Ունինք հիանալի այգի, կարելի է ըսել, որ ասիկա Երևանի մէջ միակ գործառնութիւն կատարող պանդոկներէն է, որ ունի շլացուցիչ այգի», աւելցուցած է Մարիամ Ստամբուլցեան:

## **ՀՅԴ-ն Կարելոր Յուշագիր Ստորագրած Է Երոպական Խորհուրդի Ընկերվար Ժողովրդավարականներու Յառաջդիմական Դաշինք Խմբակցութեան Հետ**

6 Յուլիսին Սթրասպուրկի մէջ Երոպական Խորհուրդի Ընկերվար ժողովրդավարականներու յառաջդիմական դաշինք խմբակցութեան եւ Ազգային ժողովի ՀՅԴ խմբակցութեան միջեւ ստորագրուած է համագործակցութեան յուշագիր մը, որ ուժի մէջ է մինչեւ 2019 թուական:

«Երկիր»-ին հետ ունեցած զրոյցին ընթացքին ՀՅԴ Բիւրոյի քաղաքական ներկայացուցիչ, Ազգային ժողովի ՀՅԴ խմբակցութեան ղեկավար Արմէն Ռուստամեան, խօսելով այդ համագործակցութեան մասին, նշած է, որ յուշագիրի ստորագրութենէն առաջ տարուած են նախապատրաստական աշխատանքներ, զորս՝ Խորհուրդի Ընկերվար ժողովրդավարականներու յառաջդիմական դաշինք խմբակցութեան կողմէ կատարած է խմբակցութեան արտաքին յարաբերութիւններու պատասխանատու եւ խմբակցութեան փոխնախագահ Քլուտ Ֆլենքենշթայնը:

Դաշնակցութեան կողմէ յուշագիրը ստորագրած է Արմէն Ռուստամեանը, իսկ Երոպական Խորհուրդի Ընկերվար ժողովրդավարականներու յառաջդիմական դաշինք խմբակցութեան կողմէ՝ խմբակցութեան ղեկավար Ճիանի Փիթելլան:

«Մենք շատ կարելոր կը նկատենք այս համագործակցութիւնը, որովհետեւ նախ ԱՊՀ տարածքին մէջ մեզմէ զատ միայն Մոլտավիայի ընկերվարական կուսակցութեան հետ համագործակցութեան յուշագիր ստորագրած են անոնք: Մինչեւ հիմա մենք Երոպական Խորհուրդի Ընկերվար ժողովրդավարականներու յառաջդիմական դաշինք խմբակցութեան հետ ունեցած ենք համապատասխան գործունէութեան ու համագործակցութեան փորձառութիւն՝ յայտնի բանաձեւերու ընդունման փաստով, երբ ընդունուեցաւ Երոպական Խորհրդարանի յայտնի բանաձեւը՝ Հայոց ցեղասպանութեան 100-ամեակին առնչութեամբ, ինչպէս նաեւ ստեղծուեցաւ Հայաստանի բարեկամներ խումբը, որուն մաս կազմողներուն մեծամասնութիւնը այս խմբակցութեան անդամներ են», ըսած է Արմէն Ռուստամեան:

Ըստ անոր, համագործակցութեան հիմնական նպատակն է զարկ տալ ընկերվար-ժողովրդավարական արժէքներուն, հիմնական շեշտը դնելով մարդու իրաւունքներու պաշտպանութեան, ժողովրդավարութեան կայացման, ընկերային արդարութեան եւ համերաշխութեան ամրապնդման վրայ: Վերոյիշեալ խմբակցութիւնը մեծ նշանակութիւն կու տայ այն դերակատարութեան, զոր Դաշնակցութիւնը պետք է ունենայ սահմանադրական բարեփոխումները յառաջ մղելու եւ ընտրական համակարգը բարեփոխելու ուղղութեամբ:

«Այս ուղղութեամբ մենք փաստօրէն կը շահինք կարելոր գործընկեր, քանի որ իրենք պատրաստ են աջակցելու այդ բարեփոխումները կեանքի կոչելու գործընթացին, Սահմանադրութեան կեանքի կոչման: Սահմանադրութենէն պիտի բխին օրէնսդրական լուրջ փոփոխութիւններ, քանի մը հարիւր օրէնքներ պետք է փոխուին, եւ իրենք կարելոր կը նկատեն յատկապէս ժողովրդավարութեան կայացման հաստատութիւններու ձեւաւորման խնդիրը, որ այդ օրէնքներու կիրարկման փուլին Հայաստան ունենայ համապատասխան մեքանիզմներով օժտուած քաղաքական համակարգ: Յատկապէս կարելոր կը նկատեն փտածութեան դէմ պայքարը, որ վերջերս դրուած է Հայաստանի օրակարգին վրայ», յայտնած է Արմէն Ռուստամեան:

Ան տեղեկացուցած է, որ քաղաքական համագործակցությունը կը ներառե քանի մը կետեր, որոնց կարգին՝ երիտասարդ մարդու մի փոխանակում, մասնաւորապէս համագործակցութեան մէջ նշուած են կետեր, որոնք կարելիութիւն պիտի տան մասնագիտացման համար հոն ուղարկել երիտասարդ տարրեր՝ ուսանելու, ծանօթանալու Եւրոպական խորհրդարանի աշխատանքներուն, աշխատելառձին, ձեռք բերելու համապատասխան կարողութիւն եւ փորձառութիւն՝ մասնագիտական ու քաղաքական: Իրենց կողմէ եւս Հայաստան պիտի այցելեն անձեր՝ ծանօթանալու Հայաստանի մէջ ընթացող քաղաքական գործընթացներուն:

Յաջորդ կետը, ըստ Արմէն Ռուստամեանի, հարակովկասեան շրջանին մէջ խաղաղութեան ու կայունութեան ամրապնդման խնդիրներն են, որոնք կը կազմեն իրենց օրակարգի կարեւոր մասը:

«Այս յուշագիրով իրենք շատ մեծ տեղ պիտի տան Դաշնակցութեան տեսակէտներուն ու գնահատականներուն՝ շրջանին մէջ տեղի ունեցող իրադարձութիւններուն, տագնապներուն, մասնաւորապէս Լեռնային Ղարաբաղի տագնապի լուծման գործընթացին եւ Հայաստանի մէջ տեղի ունեցող բարեփոխումներուն առնչուած», դիտել տուած է Արմէն Ռուստամեան՝ աւելցնելով, որ Դաշնակցութիւնը կարեւոր կը նկատէ եւրոպացի ընկերվար-ժողովրդավարական գործընկերներուն հետ համագործակցութեան խորացումը, որուն նախորդած էր ՀՅԴ անդամակցութիւնը Եւրոպական ընկերվարական կուսակցութեան՝ հանդիսանալով դիտորդ անդամ: Յուշագրի ստորագրութենէն ետք Արմէն Ռուստամեան մասնակցած է Եւրոպական խորհուրդի Ընկերվար ժողովրդավարականներու յառաջադիմական դաշինք խմբակցութեան նիստին, որուն ընթացքին բոլորը ողջունած են ձեռք բերուած համագործակցութիւնը:

## **ՀՅԴ Երիտասարդական Նոր Կեդրոնի Բացում Գիւմրիի Մէջ**

11 Յուլիսին Գիւմրիի մէջ հանդիսաւոր կերպով բացումը կատարուեցաւ քաղաքին կեդրոնը գտնուող ՀՅԴ երիտասարդական նոր կեդրոնին: Կեդրոնը՝ 18-րդ դարուն կառուցուած եւ Ալեքսանդրապոլի մեծահարուստ Ղունկի աղային տունը եղած կառոյցին մէջ կը գտնուի:



«Շիրվանեան երիտասարդական կեդրոն»-ը վերանորոգուած է Արեւմտեան Ամերիկայի հայ մշակութային հաստատութեան (ՀՅԴ) նախաձեռնութեամբ: Շէնքի վերանորոգման աշխատանքները հովանաւորած են բարերարներ Յակոբ եւ Մինա Շիրվանեանները, այդ պատճառով ալ հաստատութիւնը կը կրէ «Շիրվանեան երիտասարդական կեդրոն» անունը:

Հանդիսաւոր բացման արարողութեան ներկայ էին սփիւռքէն հարիւրաւոր հիւրեր, Շիրակի մարզպետը, Գիւմրիի քաղաքապետը, ՀՅԴ Բիւրոյի եւ Գերագոյն Մարմինի ներկայացուցիչներ, 2016 թուականի ՀՅԴ տարեկան ճամբարին մասնակից պատանիներ, ՀՅԴ երիտասարդական եւ պատանեկան միութիւններու անդամներ:

Կեդրոնի բացումէն առաջ խօսք արտասանեցին ՀՅԴ Բիւրոյի Երիտասարդութեան հետ հարցերու բաժինի պատասխանատու Մարգիս Մկրտչեանը եւ ՀՅԴ Գերագոյն Մարմինի ներկայացուցիչ Աղուան Վարդանեանը:

**ՄԻՋԱԶԳԱՅԻՆ**

## **Թուրքիան Կ' ուզէ Բարեկաւել Սուրիոյ Հետ Յարաբերութիւնները**

Թրքական «Հիւրընկալ» օրաթերթը կը հաղորդէ, որ Թուրքիոյ վարչապետ Պինարի Երլտըրըմ խօսած է Սուրիոյ հետ յարաբերութիւնները բարելաւելու անհրաժեշտութեան մասին:



«Կարելի եղածին չափ պիտի ընդլայնենք բարեկամական շղթան: Այդ է մեր նպատակը: Ներքին եւ արտաքին գետնի վրայ պիտի ընդլայնենք բարեկամական շրջանակը: Արդէն սկսած ենք այդ մէկը ընել արտաքնապէս: Իսրայէլի եւ Ռուսիոյ հետ յարաբերութիւնները բնականոն հունի մէջ դրած ենք: Սակայն վստահ եմ, որ Սուրիոյ հետ ալ պիտի վերադառնանք բնականոն յարաբերութիւններուն: Մենք ատոր կարիքը ունինք: Ահաբեկչութեան դէմ պայքարին մէջ յաջողութեան հասնելու համար անհրաժեշտ է, որ Սուրիան եւ Իրաքը կայունանան», յայտարարած է Երլտըրըմ:

## **Պերլին Կը Սպառնայ Իր Զինուորները Ինճիրլիքէն Տուն Կանչել**

«Տէօչէ Վելլէ» կը հաղորդէ, որ Գերմանիոյ փոխվարչապետ եւ Ընկերվար-ժողովրդավար կուսակցութեան ղեկավար Միկմար Կապրիէլ խօսած է Թուրքիոյ Ինճիրլիք ռազմակայանին մէջ գտնուող գերմանացի զինուորները տուն կանչելուն մասին, եթէ Անգարան չփոխէ իր կեցուածքը՝ գերմանացի երեսփոխաններուն ռազմակայան մուտքը արգիլելու հարցով:

«Եթէ խորհրդարանի անդամները չկարողանան այցելել զինուորներուն, ապա Ինճիրլիքի մէջ ռազմական միաւորներու գտնուելուն մասին այլեւս խօսք չի կրնար ըլլալ: Ասիկա շատ յստակ է», ըսած է ան:

## **Ֆրանսան Փակած Է Թուրքիոյ Մէջ Իր Դիւանագիտական Ներկայացուցչութիւնները**

Թրքական «Հիւրընկալ» օրաթերթը կը հաղորդէ, որ Թուրքիոյ մէջ Ֆրանսայի դեսպանատան պաշտօնական կայքին վրայ տեղադրուած յայտարարութեան մէջ նշուած է, որ Անգարայի մէջ Ֆրանսայի դեսպանատունը եւ Պոլսոյ մէջ Ֆրանսայի գլխաւոր հիւպատոսութիւնը փակուած են անվտանգութեան նկատառումներով:

Թուրքիոյ մէջ Ֆրանսայի դիւանագիտական ներկայացուցչութիւնները 13 Յուլիսէն՝ տեղական ժամանակացոյցով ժամը 13:00-էն սկսեալ, փակուած են մինչեւ համապատասխան հրահանգ:

Միաժամանակ չեղեալ յայտարարուած են Անգարայի, Պոլսոյ եւ Իզմիրի մէջ 14 Յուլիսին, Ֆրանսայի ազգային տօնին առիթով նախատեսուած տօնակատարութիւնները:

## **Ըստ Հարցախոյզի Մը. Քլինթոնը 13 Կետով Կը Գերազանցէ Թրամփին**

ԹԱՍՍ կը հաղորդէ, որ 12 Յուլիսին հրապարակուած է «Իփսոս» միջազգային ընկերային կեդրոնի եւ «Ռոյթըրզ»-ի միացեալ հարցախոյզին արդիւնքները, որոնք ցոյց կու տան, թէ Միացեալ Նահանգներու նախագահութեան Դեմոկրատական կուսակցութեան թեկնածու Հիլըրի Քլինթոնի եւ Հանրապետական կուսակցութեան թեկնածու Տոնալտ Թրամփի ժողովրդականութեան համեմատութեան տարբերութիւնը բարձրացած է 13 կէտով:

Վերջին տուեալներու համաձայն, որոնք ստացուած են 8 Յուլիսէն 12 Յուլիս կատարուած հարցախոյզի հիման վրայ, այս տարուան նոյեմբերին կայանալիք նախագահական ընտրութեան ընթացքին Թրամփին քուէարկելու պատրաստ է հարցախոյզին մասնակիցներուն 33 առ հարիւրը, իսկ Քլինթոնին՝ 46 առ հարիւրը: Հարցախոյզի մասնակիցներուն 21 առ հարիւրը տակաւին չէ կողմնորոշուած: Այսպիսով, թեկնածուներու միջեւ տարբերութիւնը կը կազմէ 13 տոկոսային կէտ:

Անցեալ շաբաթ տարբերութիւնը, «Իփսոս»-ի եւ «Ռոյթըրզ»-ի տուեալներով, 10 տոկոս էր: Օրին Թրամփին համակրանք յայտնած էր հարցախոյզի մասնակիցներուն 35 առ հարիւրը, իսկ Քլինթոնին՝ 45 առ հարիւրը, չէր կողմնորոշուած՝ 20 առ հարիւրը:

## **ՏԱՀԵՇ-ի «Պատերազմի Իշխան» Ապու Օմար Շիշանի Սպաննուեցաւ**

«Ռոյթըրզ» լրատու գործակալութիւնը Չորեքշաբթի օր երեկոյեան հաղորդեց, որ ՏԱՀԵՇ-ի «պատերազմի իշխան»՝ Ապու Օմար Շիշանի սպաննուած է Իրաքի ճակատամներուն ընթացքին:

Նշենք, որ Շիշանի ՏԱՀԵՇ-ի զինուորական հիմնական ղեկավարներէն էր:





*ԱՆՂՐԱԴԱՐ*

## **Հաշուեյարդար («Մարզիկ»-ի Հրատարակության 35-Ամեակին Առիթով)**

Յորելենական տարեդարձները ձեռնարկում խանդավառության առիթներ չեն: Ծափի եւ ողջոյնի առիթներ չեն: Որքան ալ սիրենք խանդավառութիւնը եւ հաւատանք անոր կարեւոր դերին՝ հաւաքական մեր կեանքին մէջ, պէտք է հաշուեյարդարը կատարել մեր անցեալի գործունէութեան: Պէտք է փորձել այդ անցեալէն դէպի ապագայ երկարող ճամբուն վրայ խարխափումներէ խուսափիլ եւ յստակ նպատակներու ձգտիլ:

Այս տեսակէտով, «Մարզիկ»-ի հրատարակութեան 35-ամեակին եւ 400-րդ թիւի հրատարակութեան զուգադիպող գոյգ տարեդարձները ՀՍԸՄ-ական մարդը կը մղեն հաստատելու, որ՝

Անցնող 35 տարիներուն, «Մարզիկ» սովորական լրատուութիւններու եւ թղթակցութիւններու թերթ մը չեղաւ, որովհետեւ հաւատաւոր գրիչներ իրենց նիւթերով, ակնարկներով եւ յուշերով դաստիարակչական օգտակար բեմի մը վերածեցին զայն: ՀՍԸՄ-ի մէկդարեայ պատմութիւնը տողանցեց անոր էջերէն, եւ իւրաքանչիւր ընթերցող անպայման ուսանելի դաս մը քաղեց անկէ: Կրտսերը «Մարզիկ»-ի էջերէն ծանօթացաւ երեցներու միութենական վաստակին, մինչ երեքը հետեւեցաւ կրտսերներու նոր թափ առնող խանդին: Պատմութեան դասագիրք մը եղաւ ան, արխիւներու շտեմարան մը, որուն դիմողները երբեք չյագեցան:

«Մարզիկ» չեղաւ մարզական կամ սկաուտական ընթացիկ թերթ մը: Մարզական հանրաձանօթ աստղերու կամ սկաուտական առաջնորդներու նկարներ չգարդարեցին անոր էջերը, որովհետեւ ան կոչումն ու պարտականութիւնը ունեցաւ ներկայացնելու մե՛րը, մերինները, որոնք յաճախ հանրաձանօթ չեղան, բայց իրենց հմայքով, մարզական ոգիով եւ ազնուութեամբ յատուկ փայլք մը տուին հայոց եռագոյնին եւ ժողովուրդին:


«Մարզիկ» չեղաւ գաղութի մը թերթը, նախընտրութիւն չորաւ ան Արեւելքի եւ Արեւմուտքի, Հայաստանի եւ սփիւռքի միջեւ: «Մարզիկ» եղաւ բոլորի՛ն թերթը, կապն ու կամուրջը հայրենիքի եւ սփիւռքի միջեւ, միացնող օղակը՝ աշխարհասփիւռ հայութեան: Հոն ուր ՀՍԸՄ-ը եղաւ, հոն անպայման «Մարզիկ»-ը ներկայ եղաւ, աշխարհի 5 ցամաքամասերու, 25 երկիրներու, 107 քաղաքներու մէջ: Հայկական տպագիր մամուլը դժուար թէ ունենայ այսքան լայն տարածում ունեցող հրատարակութիւն մը:

«Մարզիկ» եղաւ կեցուածքի եւ համոզումի թերթը՝ ժամանակի մը մէջ, երբ մարդիկ նախընտրեցին անդիմագիծ հաճոյակատարութեան մէջ ապրիլ, հեռու՝ դիրք ճշդելու եւ «մարդ նեղացնելու» փորձութենէ: Թերթը ուղղութիւն ճշդեց, առաջնահերթութիւններ սահմանեց եւ երեւոյթներ խարազանեց, երբ իր խմբագրականներով դրուատեց «Խոնարհները», գնահատեց «Շքանշանը եւ շքանշանակիրները», արժեւորեց «Քուէն, քուէարկողը եւ քուէարկութիւնը»: Թերթը չորս սերունդի ըսելիք ունեցաւ: Շեշտեց «Նորութեան պահանջը», անդրադարձաւ «Տնտեսական հզօրացման մարտահրաւեր»-ին, պահանջեց «Մեր գործին եւ յաջողութեան հաւատք», «Առողջ ու տեղի՛ն քննադատութիւն», «Պարկէշտ մրցակցութիւն» եւ «Ազգային գիտակցութիւն»:

Ի՛նչ կրնար ըսել «Մարզիկ», որ չըսաւ: Մարդուն մէջ հա՛յը կերտող եւ միութենականին մէջ արժանատի՛րը դարբնող բոլոր ստորոգելիները պարզեց ան իր առաջնորդող սիւնակներէն:

«Ճշդապահություն», «Մասնակցություն», «Յարատևություն», «Հեղինակություն»,  
«Հաւատարմություն», «Կրթություն», «Ծառայություն», «Զոհողություն»,  
«Կազմակերպութեան», «Անդր՝ աշխատանք», «Մրցելու հպարտություն», «Նախ  
նկարագիր», «Կարգ ու կանոն», «Չափ ու սահման»՝ յիշատակելի վերնագիրներ են միայն իր  
բազմահարիր խմբագրականներին:

Ճիշդ է, «Մարզիկ» չեղաւ աւելորդ ճոխություններու  
թերթը: Յաճախ ան լոյս տեսաւ համեստ պայմաններու  
մէջ, պարզ ու զուսպ դիմագիծով: Սակայն իր  
համեստութեան եւ պարզութեան մէջ ան խտացուց զինք  
ծնող միութեան բարոյական արժանիքները, որոնք  
խրաքանչիւր ՀՍՀՄ-ականի կը թելադրեն հեռու մնալ  
ցուցամուլական մեծամտություններէ եւ անիմաստ  
պոռոտախօսություններէ: «Մարզիկ» ծանօթացուց  
ՀՍՀՄ-ի գործը եւ տարածեց ՀՍՀՄ-ի խօսքը՝ առանց  
երբեք յաւակնությունը ունենալու կատարեալ  
աշխատանք մը կատարած ըլլալու: Ան ունեցաւ յաջողություններ: Ունեցաւ նաեւ թերություններ,  
որոնց սրբագրելու կամքն ու քաջությունը բնաւ չպակսեցաւ իրեն:



Ընթացիկ առումով, «Մարզիկ» մրցակիցներ չունեցաւ, որովհետեւ ան եղաւ սփիւռքահայ  
մարզական միակ թերթը: Հաւանաբար նաեւ՝ ամենէն երկարակեացը իր տեսակին մէջ: Եթէ այս  
մէկը բարենիշ մըն է ՀՍՀՄ-ի նման միութեան մը համար, որ կարողացաւ նման թերթ մը 35  
տարի ապրեցնել, ապա մտահոգութեան պատճառ մըն է միաժամանակ, որ մեր ժողովուրդը  
անցնող ժամանակներուն յաջողեցաւ մարզական նմանօրինակ այլ թերթերու գոյատեւումը  
ապահովել:

«Մարզիկ»-ին ծնունդ տալը բան մըն էր, իսկ ապրեցնելը՝ այլ բան, ըսուած է առիթով մը: Շատ  
ճիշդ: Թերթը անցնող 35 տարիներուն դիմագրաւեց բազմաթիւ մարտահրաւերներ՝ սկսեալ  
նիւթականի եւ մարդուժի տագնապէն մինչեւ հայախօսութեան եւ տպագիր մամուլի առնչուած  
դժուարություններ, սակայն ան յաջողեցաւ յարատեւել ու զարգանալ՝ շնորհիւ միութեան  
յաջորդական պատասխանատուներու նիւթաբարոյական անսակարկ աջակցութեան եւ  
հաւատարիմ ընթերցողներու մնայուն նեցուկին:

Մտածուած է արդեօք, թէ ի՞նչ կրնար ըլլալ ՀՍՀՄ-ական կեանքը առանց միութեան կեանքը  
պատմագրող «Մարզիկ»-ին: Կամ՝ փորձ կատարուած է գտնելու թիւր այն ՀՍՀՄ-ականներուն,  
որոնք դաշտերու եւ ակումբներու մէջ արիւն-քրտինք թափելէ ետք, ամբողջովին մոռացութեան  
պիտի մատնուէին, եթէ չըլլար «Մարզիկ»-ի նման հրատարակություն մը, որ չանդրադառնար  
անոնց հայանուէր գործունէութեան եւ հանրանուէր վաստակին՝ Հալէպէն մինչեւ Սիտնի,  
Պէրթուէն մինչեւ Լոս Անճելըս:

Կ'արժէ թիւերն ու գնահատականները ունենալ մեր դիմաց՝ անդրադառնալու համար, որ իբրեւ  
հաշուեյարդար, անցնող 35 տարիներուն «Մարզիկ»-ը ի՞նչ տուաւ մեզի եւ, փոխադարձաբար,  
երախտագիտական պարտքի եւ սիրոյ զգացումով, մե՞նք ինչ տուինք «Մարզիկ»-ին՝

Ի խնդիր մեր նորահաս սերունդներու քաղաքացիական օրինակելի կրթութեան եւ ազգային  
առողջ դաստիարակութեան,

Ի սպաս մեր ժողովուրդի վաղուան լուսաւոր ապագայի կերտումին:

ԼՈՒՐԵՐ ԳԱՂՈՒԹՆԵՐԷՆ

## Ուիլիըմ Սարոյեանին Առնչուող Նիւթեր Կը ՓնտրուինՖրեզնոյի Տուն-Թանգարանին Համար



Երեւան հաստատուած «Մտաւորական զարթօնք» հիմնարկը անցեալ տարի Ֆրեզնոյի մէջ բացաւ մասնաճիւղ մը՝ գնելով Ուիլիըմ Սարոյեանի բնակարանը, որ աճուրդի դրուած էր:

Աշխատանքները ընթացքի մէջ են՝ տունը վերածելու աշխարհահռչակ գրողի անուան տուն-թանգարանի, որ միաժամանակ պիտի ըլլայ մշակութային կեդրոն մը, ուր կարելի պիտի ըլլայ նորագոյն արհեստագիտութեան օգտագործումով ուսումնասիրութիւններ կատարել եւ մօտէն

ծանօթանալ Սարոյեանի աշխատանքային միջավայրին:

Թանգարանի հաւաքածոն հարստացնելու նպատակով հիմնարկը դիմեց՝ Սթենֆորտի համալսարանին, Քալիֆորնիոյ Պըրքլի համալսարանին, Քալիֆորնիոյ նահանգային համալսարանի Ֆրեզնոյի մասնաճիւղին եւ այլ հաստատութիւններու:

Այժմ հիմնադրամի տնօրէն Յակոբ Յակոբեան կը դիմէ բոլորին, որ Սարոյեանին առնչուող նիւթեր տրամադրեն թանգարանին:

## Խաչօ Եւ Արաքսի Աշաճեան Ամուրը՝ Նաւասարդեան 41-րդ Խաղերուն Պատուոյ Նախագահ



ՀՄԸՄ-ի Նաւասարդեան 41-րդ մարզախաղերուն առիթով կազմակերպուած հրապարակային ձեռնարկներու ծիրին մէջ 25 յունիսին «Եունիվըրսըլ Հիլթըն» պանդոկի սրահին մէջ տեղի ունեցաւ «Յաղթանակի պարահանդէս»-ը:

Սեղաններու օրհնութիւնը կատարեց եւ իր հայրական օրհնութիւնները տուաւ Արեւմտեան թեմի առաջնորդ Մուշեղ արք. Մարտիրոսեան, որմէ ետք օրուան հանդիսավար, Մոնթեպելլոյի քաղաքապետական խորհուրդի անդամ Ճեք

Հաճինեան ընդգծեց ՀՄԸՄ-ի հպարտանք պարգեւելու իրողութիւնը՝ վեր առնելով Նաւասարդեան մարզախաղերու քառասուն տարիներու յաղթական երթը, նաեւ՝ երիտասարդութիւնն ու համայնքը համախմբելու կարելորութիւնը:

ՀՄԸՄ-ի Շրջանային վարչութեան անունով Մանուէլ Մարսելեան շնորհակալութիւն յայտնեց ներկաներուն՝ իրենց նիւթական եւ բարոյական օժանդակութեան համար: Ապա

անդրադարձաւ 98-ամեայ ՀՄԸՄ-ի առաքելութեան եւ տեղւոյն երիտասարդութիւնը հայեցի դաստիարակութեամբ տոգորելու ուղղութեամբ տարուած գործունէութեան:

Ապա ան ներկայացուց տարուան տիպար ՀՄԸՄ-ական Գօգօ Մկրեանը եւ ՀՄԸՄ-ի 41-րդ Նաւասարդեան մարզախաղերու պատուոյ նախագահ Խաչօ եւ Արաքսի Աշաճեան ամուլը՝ ընդգծելով անոնց միութենական եւ հասարակական-քաղաքական կեանքին մէջ արձանագրած նուաճումները: Ան նաեւ յայտարարեց, թէ ՀՄԸՄ-ի 41-րդ Նաւասարդեան մարզախաղերը նուիրուած են Արցախի քաջարի զինուորներուն եւ ժողովուրդին՝ առ ի երախտագիտութիւն Արցախի սահմանները քաջաբար պաշտպանելու անոնց սրբազան գործին:

Այնուհետեւ ցուցադրուեցաւ ՀՄԸՄ-ի նորագոյն աշխատանքները ներկայացնող տեսերիզ մը:

Ներկայացուեցան «Տիպար ՀՄԸՄ-ական-2016»-ի տիտղոսին արժանացած Գրիգոր Մկրեանի ՀՄԸՄ-ական կեանքն ու միութենական նուաճումները, որմէ ետք անոր յանձնուեցաւ յուշատախտակը:


Գրիգոր Մկրեան երախտագիտական խօսք ուղղեց ՀՄԸՄ-ի Շրջանային վարչութեան՝ իրեն ընծայուած տիտղոսին համար եւ կեդրոնացաւ ՀՄԸՄ-ականի պարտականութիւններուն վրայ:

Խաչօ եւ Արաքսի Աշաճեան ամուլին կեանքի ճանապարհը ներկայացնող տեսերիզի ցուցադրութեան յաջորդեց պատուոյ նախագահութիւնը խորհրդանշող եռագոյն երիզներու յանձնումը:

Խաչօ Աշաճեան իր ելոյթին մէջ պատիւ համարեց գաղութին ողնասիւնը եղող ՀՄԸՄ-ականներով շրջապատուած ըլլալը, հաստատելով, որ ՀՄԸՄ-ը երկրորդ տուն մըն է, որ ապահով միջավայր մը եւ մարզական մրցակցութեան առողջ եւ հաճելի մթնոլորտ մը կը պարգեւէ մեզի:

Արաքսի Աշաճեան իր սրտի խօսքին մէջ նկատել տուաւ, որ «Բարձրացի՛ր, բարձրացո՛ւր»՝ կը նշանակէ, որ հետամուտ ենք շատ անելի բարձր նպատակի մը, որն է՝ վստահ ըլլալ, որ մեր երիտասարդութիւնը ունենայ նոյն ընտանեկան արժէքները, բարոյականութիւնը, սիրէ իր անցեալն ու մշակոյթը: Ան նկատել տուաւ, որ միասնականութիւնը հիանալի ուժ մըն է, որուն համար մենք պէտք է անհատապէս եւ հաւաքականօրէն զօրակցինք ՀՄԸՄ-ին:

## **Հրայր Թերզեանի Անուան Փողոց՝ Իտալիոյ Վերոնա քաղաքին Մէջ**



16 յունիսին Իտալիոյ Վերոնա քաղաքին մէջ կայացաւ փողոցի մը անուանակոչութիւնը: Փողոցը կոչուեցաւ ջղային հիւանդութիւններու մասնագէտ, Վերոնայի համալսարանի առաջին վերատեսուչ Հրայր Թերզեանին անունով:

Իտալիոյ մէջ Հայաստանի դեսպան Վիքթորիա Պաղտասարեան այս առիթով նշեց, որ Հրայր Թերզեան այն հազարաւոր

հայերեն է, որոնք որպես Հայոց ցեղասպանութենէն վերապրողներու զաւակ՝ ո՛չ միայն չյուսահատեցան, այլ նաեւ պահպանելով հայկական ինքնութիւնը՝ կրցան նուիրուիլ նոր հայրենիքին, ուր յարգանքի ու գնահատանքի արժանացան:

Վերոնայի քաղաքապետ Ֆլաւիօ Տոզի նկատել տուաւ, որ Թերզեանին անունով կը կոչուի այն փողոցը, ուր յառաջիկային պիտի հաստատուի համալսարանի մասնաճիւղերէն մէկը, աւելցնելով, որ այս քայլը յարգանքի տուրք է ո՛չ միայն վաստակաշատ գիտնականին, այլ նաեւ՝ Վերոնայի ու Իտալիոյ հայ համայնքին, որ ամբօրէն կապուած է իր արմատներուն:

Վերոնայի համալսարանի վերատեսուչ Նիքոլա Սարթոր խօսելով Թերզեանին մասին՝ յայտնեց, որ ան իր ամբողջ եռանդն ու գիտելիքները ներդրած էր համալսարանի յառաջընթացը ապահովելու գործին մէջ:

## **Հայ Դատի Յանձնախումբին Հանդիպումը ՊելճիքայիՄէջ Գերմանիոյ Դեսպանին Հետ**



Վերջերս ՀՅԴ Եւրոպայի եւ Պելճիքայի Հայ դատի յանձնախումբերէն կազմուած միացեալ պատուիրակութիւն մը այցելեց Պելճիքայի մէջ Գերմանիոյ դեսպանատուն եւ տեսակցեցաւ դեսպան Ռիտիկեր Լիտեքինկի հետ: Պատուիրակութեան մաս կը կազմէին՝ ՀՅԴ Եւրոպայի Հայ դատի յանձնախումբի նախագահ Գասպար Կարապետեան, ՀՅԴ Եւրոպայի Հայ դատի յանձնախումբի գրասենեակի հաղորդակցութեան

պատասխանատու Պետօ Տեմիրճեան, ՀՅԴ Պելճիքայի Հայ դատի յանձնախումբի ատենապետ Լիաննա Մարգարեան եւ քարտուղար Աշխէն Ֆիքսովա:

Այցելութեան հիմնական նպատակն էր Պունտեսթակի կողմէ Հայոց ցեղասպանութեան բանաձեւի որդեգրման առիթով գնահատանքի խօսք ըսել գերմանացիներուն:

Դեսպանը շնորհակալութիւն յայտնեց այցելութեան համար՝ նշելով, որ այս բանաձեւը կը միտի նաեւ Գերմանիոյ մասնակի մեղսակցութիւնը ընդունիլ եւ աշխատիլ, որ Թուրքիա եւս առերեսուի իր անցեալի մութ էջերուն հետ: Դեսպան Լիտեքինկ բարձր գնահատեց ծագումով թուրք գերմանացի երեսփոխաններուն ներդրումը, որ ինքնին աւելի արժէք եւ ուժգնութիւն կու տայ որդեգրուած բանաձեւին:

Հանդիպումին ընթացքին քննարկուեցաւ նաեւ Լեռնային Ղարաբաղ-Արցախի հիմնահարցի խաղաղ կարգաւորումը, նկատի առնելով, որ Գերմանիան ներկայիս ԵԱՀԿ-ը նախագահող երկիրն է: Դեսպանը հաստատեց, որ Գերմանիան կառչած կը մնայ ԵԱՀԿ-ի Մինսքի խմբակին եւ համանախագահութեան աշխատանքներուն:

Արձարծուեցան նաեւ հայութիւնը եւ Հայաստանը յուզող այլ հարցեր:

**[www.aztarar.com](http://www.aztarar.com)**

ԱՅԼԱԶԱՆ

## 7 «ՈՆ»-եր, Որոնք Կը Փոխեն Ձեր Կեանքը

Կեանքը շատ կարճ է չսիրած գործով զբաղելու համար: Կեանքը շատ կարճ է տեսաբար հաճոյակատարի դերը խաղալու համար: Ճիշդ ժամանակին «ՈՆ» ըսելը կը փոխէ ձեր կեանքը, վստահաբար՝ դէպի լաւը:

- 1.- «ՈՆ» ըսէք այն աշխատանքին, որ չէք սիրեր: Կարելոր է, որ աշխատանքը ձեզի հաճոյք պատճառէ:
- 2.- «ՈՆ» ըսէք ձեր ծնողներուն ակնկալութիւններուն: Ձեր կեանքը ձեզի կը պատկանի, եւ դուք պիտի որոշէք՝ ինչպէ՛ս պիտի չապրիք:
- 3.- «ՈՆ» ըսէք ձեզմէ վայրկենական պատասխան սպասողին: Ձեր ժամանակը առէք եւ համոզումով տուէք ձեր կարծիքը:
- 4.- «ՈՆ» ըսէք այն մարդոց, որոնք միշտ օգնութիւն կը խնդրեն ձեզմէ: Օգնել կարելի է, սակայն ուրիշներուն գործերը միշտ ձեր վրայ պիտի չառնէք:
- 5.- «ՈՆ» ըսէք տեսաբար տրտնջացող անձերուն, որոնք իրենց լաւ օրերուն յաճախ կը մոռնան ձեր գոյութիւնը:
- 6.- «ՈՆ» ըսէք ձեր հանգիստը խանգարող եւ ազատութիւնը կաշկանդող դրացիներուն, որոնք մնայուն անկոչ հիւրի դերին մէջ են:
- 7.- «ՈՆ» ըսէք վախերուն: Արկածներն են կեանքին համեմբ, ալ ի՞նչ արկած՝ առանց վախի...

## Շանել Լորաձեւութեան Տունը Կը Մեծարէ Ցորենը

Վերջերս Փարիզի մէջ ցուցադրուեցաւ Շանել Լորաձեւութեան տան գոհարեղէններու հաւաքածոն, որուն թեման Կապրիել Շանելի սրտին խօսող ցորենն էր:

Փոքր տարիքէն նշանաւոր ֆրանսուհին յատուկ սեր ունեցած է ցորենին եւ ցորենի հասկերուն հանդէպ: Հետեսաբար գոհարեղէններու վերջին հաւաքածոյին թեման պատահական չէր:



Հարստութեան, առատութեան, վերանորոգման եւ բախտաբերութեան խորհրդանիշ ցորենը Կապրիել Շանելի կեանքին մէջ յատուկ տեղ գրաւած է: Ան որպէս բախտի խորհրդանիշ՝ ցորենի հասկերու փունջեր զետեղած էր իր յարկաբաժինին, բայց նաեւ պանդոկի սենեակներուն մէջ: Իսկ զուգահիւսութեամբ մը նշանաւոր ձեւագիտուհին ծննդեան թուականը (19 օգոստոս) կը համընկնի հունձքի տօնին:

62 կտորէ բաղկացած գոհարեղէնները՝ մանեակ, օղ, ապարանջան, մատանի եւ զարդասեղ, պատրաստուած են ձերմակ եւ դեղին ոսկիէ եւ զարդարուած են ադամանդի եւ դեղին շափիւղայի քարերով:

## Միակ Բոյս Մը՝ Պատրաստելու Համար Թե՛ Տապկուած Գետնախնձորներ, Թե՛ Այլ Լոլիկով Թացան

Անգլիոյ շուկային վրայ վերջապէս իջած է «Թումթէթօ»-ն: Այս բոյսը նոյն ատեն կ'արտադրէ լոլիկներ... եւ գետնախնձոր:

Ո՛չ, «Թումթէթօ»-ն տարօրինակ փորձերէ մէջտեղ չէ ելած, արտասովոր տարրալուծարանի մը մէջ: Անիկա պարզապէս «զգուշօրէն կատարուած» պատուաստ մըն է՝ ըստ այս նիւթը շուկայ իջեցնող պարտիզամշակութեամբ զբաղող «Թումսըն Էնտ Մորկըն» անգլիական ընկերութեան: Եւ ահաւասիկ արդիւնքը. այս երկու տեսակներէ յառաջացած «նոր» բոյսը անուանուած է «Թումթէթօ» (թոմթէթօ եւ փոթէթօ, լոլիկ եւ գետնախնձոր, անգլերէն բառերէն), որ գետնին վրայ կ'արտադրէ կեռաս-լոլիկներ եւ գետնախնձոր՝ արմատներուն մակարդակին վրայ:

Մե՞ծ գիտ մը: Ոչ այնքան մեծ... լոլիկները եւ գետնախնձորները նոյն ընտանիքին մաս կը կազմեն: Հետեւաբար անոնք իրարու հետ բնականօրէն կը յարմարին: Անոնց իրարու հետ խառնուրդը չի կարօտիր անոնց ծիները փոփոխութեան ենթարկելու, այլ պարզապէս գտնել նոյն հասակով երկու կոթեր, զանոնք կտրել եւ ապա զանոնք իրարու կապել. թեքնիք մը, որ մատչելի է ռեւէ պարտիզպանի... Մակայն եթէ պատահի, որ օր մը դուն հանդիպիս ծառի մը, որ նոյն ատեն կու տայ թե՛ խնձոր, թե՛ պանան, թե՛ ալ կեռաս, հոս պէտք է զգուշանաս:



Մակայն ինչի՞ կը ծառայէ նման գիտ մը: Ոչ անպայման մեծ բանի մը. տունկը կ'արժէ մօտաւորապէս 20 տոլար եւ պտուղներ կու տայ միայն մէկ եղանակ: Ապա պէտք է նոր տունկ մը գնել: Հետեւաբար հաճելի է պատշգամին վրայ նման տարօրինակ բոյս մը ունենալ, սակայն անիկա մեծ գիտ մը չէ:

### Իսկ Լոլիկը Պտտ՞ող Է, Թե՛ Բանջարեղէն

Անիկա թե՛ պտուղ է, թե՛ ալ բանջարեղէն:

Անիկա պտուղ կը համարուի, որովհետեւ կը կազմուի բոյսի մը ծաղիկէն: Մակայն նոյն ատեն բանջարեղէն է, որովհետեւ բանջարեղէնը, բանջարանոցի մը մէջ, պարտիզպանին կողմէ մշակուած բոյսէ մը բաժին մըն է: Հետեւաբար բանջարեղէն մը կրնայ ըլլալ պտուղ (ինչպէս՝ պղպեղը), սակայն նաեւ՝ արմատ մը (ինչպէս ստեպղինը), կամ՝ կոթ մը (ինչպէս կարոսը), կամ ալ՝ տերեւ մը (ինչպէս հազարը):

Լոլիկը եկած է Հարաւային Ամերիկայի հիւսիս-արեւմուտքէն: Էնթաները լոլիկը կը մշակէին 16-րդ դարուն, սպանացիներուն ժամանումէն շատ առաջ:

Եւրոպայի մէջ առաջին լոլիկները տնկուեցան Սպանիոյ հարաւը, Սելիլիոյ մէջ: Մակայն այդ ժամանակաշրջանին մարդիկ կը կարծէին, թէ այս բոյսը թունաւոր էր... Լոլիկը Ֆրանսա կը հասնի 17-րդ դարուն եւ կ'անուանուի «սիրոյ խնձոր»:



Իրարու հետ բազմաթիւ խաչաձեւումներէ ետք, այժմ գոյութիւն ունին լոյիկի հազարաւոր տեսակներ՝ տարբեր գոյներով եւ տարբեր ձեւերով: Գիտնականները կը շարունակեն տարբեր տեսակներ իրերու հետ խաչաձեւել՝ ստանալու համար նոր լոյիկներ, աւելի լաւ, աւելի գեղեցիկ եւ հիւանդութիւններուն ու միջատներուն դէմ աւելի դիմացող:

## Գիտէ՞ր, Թէ...

Լոյիկը կազմուած է 94 առ հարիւր ջուրէ:

Գետնախնձորի կողքին, լոյիկը աշխարհի մէջ ամէնէն շատ եփուած բանջարեղէնն է:

## Հոգեբանական Փորձ. Ի՞նչ Տեսաք Նկարին Վրայ

Ուշադիր նայեցէք նկարին եւ ըսէք, թէ առաջին անգամ ի՞նչ տեսաք նկարին վրայ:

Մոմակա՞լ, տղամա՞րդ, կի՞ն:

Ճշդելէ ետք ձեր տեսածը, կարդացէք համապատասխան բացատրութիւնը ձեր նկարագրային գիծին մասին:

– Եթէ առաջին հերթին մոմակալը նկատեցիք, լայնախոհ անձ էք: Ձեր ծրագիրները միշտ փառահեղ են: Դուք լայնահոգի, համբերատար եւ փափկանկատ մարդ էք, բայց ուշադիր, շատեր կը շահագործեն ձեր ազնուութիւնը: Եղէք աւելի զգուշաւոր՝ շրջապատի ընտրութեան ժամանակ:

– Եթէ առաջին հերթին կինը նկատեցիք, դուք վիպապաշտ անձ մըն էք, յաճախ իրականութեան քովէն կ'անցնիք եւ ձեր երազներուն եւ յոյզերուն զոհը կ'երթաք:



Այս հեքոտ կեանքին մէջ լաւ է երբեմն վիպապաշտ ըլլալը եւ ծանր իրականութենէն քիչ մը անջատուիլը, բայց ուշադիր եղէք, որ յուսախաբութիւններ չապրիք:

– Եթէ առաջին հերթին տղամարդը տեսաք, դուք չափազանց հանդարտ եւ պաղարիւն մարդ էք: Ամէն հարցի գծով ունիք ձեր սեփական կարծիքը եւ իւրայատուկ աշխարհահայեացքը: Դուք բաւարար ուշադիր չէք ձեր շրջապատին, անհրաժեշտ է քիչ մը ուշադրութիւն դարձնել ձեր հարազատներուն:

[www.armenianprelacykw.com](http://www.armenianprelacykw.com)